

KERATAN AKHBAR

TARIKH : 1 OGOS 2025
AKHBAR : BERITA HARIAN
MUKA : 5
SURAT

Malaysia tetap hala tuju terajui ekonomi Asia Tenggara dalam AI

RANCANGAN MALAYSIA KE-13

Malaysia tetap hala tuju terajui ekonomi Asia Tenggara dalam AI

Langkah kukuh daya saing ekonomi negara, bangunkan industri lebih mampan

Oleh Alzahrin Alias, zahrin@bh.com.my

Kuala Lumpur: Malaysia menetapkan hala tuju yang jelas untuk menerajui ekonomi Asia Tenggara dalam kecerdasan buatan (AI) melalui beberapa agenda utama.

Penerapan inovasi teknologi tempatan itu akan diberi tumpuan bagi menggalakkan pertumbuhan ekonomi, khususnya dalam pembangunan aset digital strategik seperti AI, data analitik dan sistem digital kerajaan.

Aktiviti penyelidikan, pembangunan, pengkomersialan dan inovasi (RDCl) juga akan dipergiat bagi meningkatkan produk dan perkhidmatan berasaskan 'Made by Malaysia'.

Perdana Menteri, Datuk Seri Anwar Ibrahim, berkata langkah itu penting untuk memperkukuh daya saing ekonomi negara, selain membangunkan industri yang lebih mampan dan berimpak tinggi selaras hasrat menjadi negara berteraskan kecerdasan buatan.

"Bagi memanfaatkan peluang ini, Pelan Tindakan AI Kebangsaan 2030 akan memacu pembangunan bakat tempatan, penyelidikan, pengkomersialan teknologi serta penyediaan infrastruktur digital bagi menyokong adaptasi AI secara meluas," katanya. Anwar menekankan ekosistem

AI juga akan dimantapkan melalui pengukuhan kepercayaan digital.

Strategi kepercayaan digital dan keselamatan data nasional akan dilancarkan untuk melindungi data peribadi, menangani ancaman siber serta memastikan keselamatan ekosistem dan kedaulatan digital negara.

Pelaksanaan dasar dan strategi utama seperti Dasar Sains, Teknologi dan Inovasi Negara, Dasar

Revolusi Perindustrian Keempat (4IR) serta Rangka Tindakan Ekonomi Digital Malaysia akan diberikan keutamaan, dengan fokus kepada pelaksanaan yang berkesan dan memberi manfaat terus kepada rakyat serta industri.

Penggunaan digital twin

Selain itu, inisiatif Pengenalan Identiti Digital Perniagaan dan penggunaan digital twin akan turut menjadi ikhtiar penting di

dalam meningkatkan daya saing dan inovasi dalam kalangan pemain industri.

"Bagi memperkukuh tadbir urus berasaskan data digital pula, inisiatif seperti bank data negara sebagai pangkalan data nasional yang bersepadu akan dilaksanakan dan Suruhanjaya Data akan diwujudkan bagi mengawal selia data negara.

"Program akan dilaksanakan bagi memupuk literasi AI seawal peringkat rendah, memperluas harta intelek tempatan, meningkatkan suntikan dana strategik dan menggalakkan kolaborasi rentas sektor antara pemain industri, institusi penyelidikan, universiti dan inovator muda negara.

"Pendekatan ini akan memastikan ekosistem inovasi negara dapat berkembang secara menyeluruh dan memberi pulangan jangka panjang kepada ekonomi dan rakyat," katanya.

Satu penyampaian sarat dengan ketegasan, tekad, keterangkuman dan berstrategi untuk menjadikan Malaysia peneraju ekonomi Asia Tenggara, sekali gus mengangkat semula darjat dan martabat negara



Tan Sri Shamsul Azri Abu Bakar, Ketua Setiausaha Negara